

պիսի մեծանուն ճարտարապետներ, ինչպիսիք էին Տրդատ Անեցին ու Մանվել Վասպուրականցին:

Այդ շրջանում հանդես եկան նաև հայոց եկեղեցիների առաջին գավիթները, որոնք հետագայում ընդհանրացան և տարածվեցին ամբողջ Արևելյան Հայաստանում և միջնադարյան հայկական ճարտարապետության վարդը դարձան:

Թորամանյանն արդեն գիտե Անիի Բագրատունյաց վերջին թագավորներից մեկը հանդիսացող Հովհաննես Ամբատի Հոռոմոսում շինած ժամատունը, որի արձանագրության մեջ ասված է՝

«Ի ՆՁ է (487=1038) թուականիս Հայոց ետու ես, Յովաննէս Շահանշահ, որդի Գագկա Շահանշահի, զիմ այգին, որ ի Կողբ՝ յիմ եկեղեցիս, ի սբ. Յովաննէս, զոր շինեցի ի վանս Հոռոմոսի հանդերձ ժամատամբս...»<sup>1</sup>:

Եվ եթե դրա վրա ավելացնենք նաև դրանից առնվազն 50 տարի առաջ շինած Սանահնի գավիթը՝ դարձյալ Բագրատունի թագավորների օրով, ինչպես նաև 996 թվականին Գնդեվանքում կառուցված գավիթը, որ մեջ է բերել ճարտ. Ստ. Մնացականյանը, ապա կզանք այն եզրակացության, որ գավիթներն ու ժամատները, լինելով զուտ հայկական երևույթ (Թորամանյանի բառերն են), առաջ են եկել Արևելյան Հայաստանում, 10-րդ դարում և ոչ թե Փոքր Ասիայում կամ Կիլիկիայում (ինչպես ենթադրել է Թորամանյանը):

Սանահնի այդ հնագույն գավիթը, որ բանդել են 1181 թվականին, նրա տեղում այժմ գոյություն ունեցող գավիթը շինելու ժամանակ, գրավոր տեղեկություններով հաստատվող, մինչև այժմ մեզ ծանոթ ամենահինն է հայկական ճարտարապետության մեջ:

\* \* \*

Կիրակոս Գանձակեցին պատմում է, որ Հովհաննես-Ամբատ հայոց Բագրատունի թագավորը, գժտված լինելով Պետրոս Գետադարձ կաթողիկոսի հետ, նրան բանտ է դնում

և Սանահնի առաջնորդ Դիոսկորոսին բերում ձեռնադրում է կաթողիկոս<sup>2</sup>: Վարդան վարդապետը գրում է, որ Դիոսկորոսը կաթողիկոս է եղել ընդամենը մեկ տարի<sup>3</sup>, բայց վերոհիշյալ երկու պատմագիրներից և ոչ մեկը Դիոսկորոսի կաթողիկոսության տարեթիվ մասին ոչինչ չի ասում: Դիոսկորոսը հիշատակված է հայոց ՆՁ է=1038 թվականին Կարնո Շխնոց գյուղում գրված մի մագաղաթյա երկաթագիր ավետարանի հիշատակարանում, որտեղ նվագրիս գրիչը հետևյալն է գրել նրա մասին.

«...Գրեցաւ սուրբ ակետարանս այս ձեռամբ իմով Եւագրիս մեղուցեալ և անարժան կրանաւորի, ի թուականութեան հայոց ՆՁ է, ի հայրապետութեան տեառն Պետրոսի եւ զկնի նորա կենդանութեան նստաւ այդ հայրապետ, որ կոչի անուն նորա Դեոսկորոս և ի թագաւորութեանն Յունաց Միխայելի բարեպաշտի»<sup>4</sup>:

Դիոսկորոսի կաթողիկոսության մասին մանրամասն տեղեկություններ է հաղորդում և տարեթիվը նշում դեպքերին գրեթե ժամանակակից Մատթեոս Ուոհայեցին (11—12-րդ դդ.) իր ժամանակագրության մեջ: Նա պատմում է, որ Պետրոս Գետադարձ կաթողիկոսը հայոց ՆՁՁ (486=1037) թվականին ծածկարար գնում է Վասպուրական, որովհետև թագավորը, բոլոր նախարարներն ու հայոց ազատագունդ զորքը նրա պատվիրաններին ունկնդիր չէին լինում: Նա Վասպուրականի Չորավանքում մնում է շորս տարի: Հովհաննես թագավորն ու հայոց բոլոր նախարարները նենգաբար թուղթ են գրում կաթողիկոսին և երզումներով խոստանում են ունկնդրել նրա քրիստոնեական վարդապետություններին և հրամաններին: Այդ գործին միջնորդում են նաև բյուզանդացի կողմնակալ իշխանները: Պետրոս կաթողիկոսը հավատում է նրանց և վերադառնում է, բայց հենց Անի մտնելու միջոցին թագավորի հրամանով նրան ձերբակալում են և բանտարկում:

Այնուհետև թագավորը Անի է բերել տալիս Սանահնի առաջնորդ Դիոսկորոսին և

<sup>1</sup> Կ. Կոստանյանց, Վիմական տարեգիր, էջ 21:

<sup>2</sup> Պատմութիւն Հայոց, արարեալ Կիրակոսի Վ. Գանձակեցւոյ, Թիֆլիս, 1909, էջ 84:

<sup>3</sup> Հաւաքումն պատմութեան Վարդանայ վարդապետի լուսաբանեալ, Վենետիկ, 1862, էջ 98:

<sup>4</sup> Գ ա Ր Ե գ ի ն Ա. կաթողիկոս, Յիշատակարանք ձեռագրաց, հատ. Ա, 1951, Անթիլիաս, էջ 219: